

Չնուփանների ակերակները եւ մարդիկների գերեզմանները իմ վրայ միշտ միեւնոյն տպաւորութիւնն են գործել: Երկուսի մէջ եւս տեսնում է դադարած կեանքը, երկուսն էլ յիշեցնում են անցեալը, որ մի ժամանակ ապրել են, գործել են եւ, ժամանակի հետ քսուելով, մաշուել ու մեռել են, թողնելով միայն կենդանի յիշատակներ: Մարդ, նայելով իր նախահարց գերեզմանների վրայ, մի առանձին հպարտութիւն է զգում, երբ մտաբերում է, որ նրանք իրանց ժամանակի ամենալաւ մարդիկն են եղել: Գերեզմանի մէջ անգամ նրանց փոշիները պահպանում են վաղեմի վեհութիւնը: Ակերակների փոշիների մէջ եւս ապրում է անցեալ մեծութիւնը, որ միեւնոյն հպարտութիւնը եւ միեւնոյն քաջալերութիւնն է ազդում ապագայ սերունդի մէջ: Ակերակների փոշիներից է կազմած այն շաղախը, որ միացնում է ներկայ սերունդի սրտերը նախահարց հետ:

Թօփրակ-կալէի լեռան մէջ նոյնպէս գտնւում են շատ այրեր, քարանձաւներ, ստորերկրեայ անցքեր, որպիսիները տեսանք Շամիրամի բերդի մէջ: Դրանցից եւ ոչ մէկը բնական չէ, բոլորն էլ փորած են ամենաամուր ժայռերի մէջ, եւ նրանց այժմեան գեղեցկութիւնը բաւական ապացոյց է, թէ որքան զարգացած է եղել այդ աշխարհում արհեստը: Այրերից միայն մէկի մէջ մտանք մենք, որ կոչւում է Չըմփ-զըմփ-մաղարայ, այսինքն զըմփզըմփալով ձայն հանող այր: Ամենաթեթեւ ձայնը այդ քարանձաւի մէջ զըմփզըմփալով արծազանք է տալիս: Ժայռի մէջ բացւում է մի մեծ մուտք, որը հարիւրաւոր քարեայ սանդուղքներով իջնում է դէպի լեռան խորքը: Քարի մէջ փորած երկու լուսամուտներ վերեւից խիստ աղօտ լոյս են ձգում այդ ստորերկրեայ վիրապի մէջ: Քարեայ սանդուղքի վերջին աստիճանի մի կողմում բացւում է մի ընդարձակ, քառակուսի այր, դա է, որ կոչւում է Չըմփ-զըմփ-մաղարայ: Այդ այրի միջից մի առանձին անցք տանում է դէպի երկրի խորքերը. բայց ո՞ր է գնում, որտե՞ղ է վերջանում, աստուած գիտէ: Մեր առաջնորդը դարձեալ խօսում էր ստորերկրեայ ապարանքների մասին. Ժողովրդի ավանդութիւնը նոյնն էր խօսում: Այդ բոլորը տեսնելով, ես պատրաստ էի հաւատալ, որ այստեղ եղել է մի ստորերկրեայ աշխարհ, եւ այդ անցքերը տանում են դէպի այն աշխարհը: Ասլանը այդ մասին ինձ ոչինչ չասաց. նա բոլորովին ուրիշ նպատակներով էր քննում այդ անցքերը: Նա ցանկանում էր ստուգել, թէ որքա՞ն ուղիղ է այն կարծիքը, թէ այդ ստորերկրեայ անցքերը հաղորդակցութիւն ունեն քաղաքի մէջ գտնող Շամիրամի բերդի հետ: Այդ էր պատճառը, որ մեզանից ոչ մէկը չհամարձակուեցաւ Չըմփ-զըմփ-մաղարայից անցնել եւ առաջ գնալ, իսկ նա, վառելով իր հետ վերառած մոմապատը, շատ առաջ գնաց եւ վերադարձաւ համարեա մէկ ժամից յետոյ: